



ORKUSKIPTI: 34 NÝJAR RAFHLEÐSLUSTÖÐVAR Á NE

Úthlutað var nýverið styrkjum úr [Orkusjóði](#) en veruleg aukning fjármagns til orkuskipta var samþykkt af Þórdísi Kolbrúnu Reykþjóð Gyldadóttur, ráðherra ferðamála-, iðnaðar- og nýsköpunar og Guðmundi Inga Guðbrandssyni, umhverfis- og auðlindaráðherra. Samþykkt úthlutun úr sjóðnum 2021 er rúmlega 470 m.kr., fjármögnuð sameiginlega af ANR og UAR ráðuneytum ásamt Orkusjóði.

Óskað var sérstaklega eftir umsóknum til hleðslustöðva við ferðamannastaði, líkt og áður hefur verið gert, en nýbreytni þetta árið að var að beina sjónum sérstaklega að framleiðslufyrirtækjum sem nota olíu og mætti minnka stórlega og jafnvel fjarlægja alveg með hagkvæmum hætti. Þannig er áætlað að yfir 5000 tonn koltvísýringisgilda (um 2 milljónir olíulíttra) hverfi með þessum aðgerðum. Önnur nýjung var stuðningur við rafknúnar vinnuvélar (t.d. gröfur, skotbómulyftara o.fl.) þar sem fjölbreytni er orðin mikil frá framleiðendum en innleiðing hérlendis skortir.

21 verkefni á Norðurlandi eystra hlutu styrki og var heildarupphæð þeirra rúmlega 51 m.kr. Meðal verkefna eru 34 nýjar rafhleðslustöðvar á svæðinu, rafliðlættingar á ýmsum stöðum og rafknúnar keðjusagir fyrir skógrækt. Þá verður gömlum lyfturum skipt út fyrir nýja rafmagnsdrifna og díselknúnum hverfisteypuofn skipt yfir í rafmagnsknúinn.

Heildarlista yfir öll styrkt verkefni úr Orkusjóði 2021 má finna [hér](#).



NÝ GREINARGERÐ: SÓKNARÁÆTLANIR LANDSHLUTA

[Ný greinargerð um framvindu samninga og ráðstöfun fjármuna í gegnum sóknaráætlanir landshlutanna](#) var birt nýverið. Þar má sjá skýr merki um þær jákvæðu breytingar sem orðið hafa við að færa úthlutun og umsýslu opinberra sjóða til þeirra byggðalaga sem þekja sín tækifæri og áskoranir best. Landshlutasamtökin hafa öll lagt á það aukna áherslu að tryggja víðtækari fjárhagslegan stuðning frá fleiri ráðuneytum og þá sérstaklega atvinnuvega- og nýsköpunarráðuneytinu og umhverfis- og auðlindaráðuneytinu þar sem atvinnuþróun, nýsköpun og umhverfismál eru á meðal lykilþátta sóknaráætlana allra landshluta.

Staðan í dag er sú að aðeins tvö ráðuneyti leggja fjármuni til sóknaráætlana en það eru samgöngu- og sveitarstjórnarráðuneyti og mennta- og menningarmálaráðuneyti. Óskað hefur verið eftir aðkomu annarra ráðuneyta að fjármögnun sóknaráætlana en af því hefur enn ekki orðið. Skortur á aðkomu ráðuneyta annarra en þeirra tveggja sem lagt hafa fjármuni til sóknaráætlana gerir að verkum að hætta er á að tengsl annarra ráðuneyta við verkefnið verði lítil sem engin. Sóknaráætlanir eru þó kjörinn vettvangur til samstarfs landshluta og ráðuneyta til að tryggja að aðgerðir stærri áætlana nái fram að ganga um allt land.

Í greinargerðinni eru upplýsingar um hvernig fjármagni hefur verið úthlutað og skipt, hvernig verkefni eru fjármögnuð og hægt er að lesa um nokkur áhersluverkefni og önnur verkefni sem styrkt hafa verið úr uppbyggingarsjóðum.

FYRSTI VIÐSKIPTAHRADALL NORÐURLANDS

[Norðanátt](#), regnhlífasamtök nýsköpunar á Norðurlandi, [stóðu fyrir kynningarfundum](#) um viðskiptahraðalinn Vaxtarrými mánudaginn 13. september. Vaxtarrými er fyrsti viðburður Norðanáttar af þremur, átta vikna viðskiptahraðal fyrir sprotafyrirtæki, frumkvöðla og nýsköpunarverkefni innan rótgrónna fyrirtækja. [Alls búrúst 13 umsóknir í hraðalinn en 8 kraftmikil nýsköpunarteymi voru valin til þátttöku](#). Þáttökuteymin eru Mýsköpun, Plastgarðar, Íslandsþari, Mýsilica, Nægtarbrunnur Nátturunnar, Icelandic Eider, Austan Vatna og Ektafiskur.

Markmið Vaxtarrýmisins er að hjálpa teymunum að vaxa hratt á þessum átta vikum og á þeirra forsendum. Dagskráin er sérhönnuð með þarfir þáttökuteymanna í huga. Teymin hitta reynslumikla leiðbeinendur, frumkvöðla, fjárfesta og stjórnendur fyrirtækja á Norðurlandi og víðar, sitja vinnustofur og fræðslufundi og mynda sterkt tengslanet sín á milli. Að Vaxtarrýminu loknu, verður boðið upp á vinnusmiðju í janúar og fjárfestahátíð í mars sem auglýst verða þegar nær dregur. Frekari upplýsingar gefur Anna Lind í annalind@ssne.is

MATSJÁIN: STUÐNINGUR VIÐ MATARFRUMKVÖÐLA

Landshlutasamtökin á öllu landinu í samstarfi við Samtök smáframleiðenda matvæla hlutu styrk úr Matvælasjóði fyrir Matsjána, verkefni til að sníða aðferðarfræði úr verkefninu Ratsjá að matarfrumkvöðlum. Ratsjain var aftur á móti sniðin að þörfum aðila í ferðaþjónustu. Matsjain miðar að aukinni verðmætasköpun, til að styrkja stöðu matarfrumkvöðla, efla framleiðslu, auka sölutekjur og styðja við sjálfbærni í rekstri. Markmið stuðningskerfisins er að auka innsýn þátttakenda í rekstur og innviði fyrirtækja sinna með það fyrir augum að finna leiðir til að auka hagkvæmni, bæta rekstur, auka fagmennsku og innleiða samfélagsábyrgð í fyrirtækin.

Smáframleiðendur matvæla munu vinna greiningu á sínum rekstri og fá einkatíma með ráðgjöfum. Á svokölluðum heimafundum, sem starfsmenn landshlutasamtakanna koma til með að stýra, verður rekstur eða vara smáframleiðenda rýnd til gagns á jafningjagrundvelli. Smáframleiðendur fá jafnframt fyrirlestra og fræðslu sem tengjast starfsemi þeirra. Með víðtæku samstarfi gefst tækifæri á að mynda sterkt tengslanet meðal smáframleiðenda matvæla og byggja þannig grunn að góðu áframhaldandi samstarfi á landsvisu.

Verkefnið er 16 vikur og hefst í janúar 2022. Auglýst verður eftir þátttakendum í nóvember en frekari upplýsingar gefa Elva og Anna Lind í elva@ssne.is og annalind@ssne.is.

VIÐTAL VIÐ STYRKÞEGA UPPBYGGINGARSJÓÐS: BARNABÓKMENNTAHÁTÍÐ



Barnabókmenntahátíð er tveggja daga hátíð þar sem barnabækur, börn og barnabókahöfundar eru í fyrirrúmi. Verkefnið fór fram í Hofi í apríl og var unnið í samstarfi við Menningarhúsið Hof, Barnabókasetur Íslands, Gilja- og Naustaskóla, réttindaskólum Unicef á Akureyri og Ungmennaráðs Akureyrar. Verkefnið hlaut styrk úr uppbyggingarsjóði en starfsmaður SSNE fékk Kristínu Sóley Björnsdóttir, menningarstýru Hof og verkefnastjóra Barnabókmenntahátíðarinnar til að segja okkur aðeins nánar frá verkefninu.



Ýta undir ímyndunarafli barnanna

„Tilgangur hátíðarinnar er að ýta undir ímyndunarafli barnanna okkar sem alast upp í afar sjónrænum heimi í dag“, segir Kristín Sóley, verkefnastjóri. Að sögn Kristínar eru markmiðin fyrst og fremst þau að virkja börn til þátttöku og sköpunar og efla menningaruppeldi í landshlutunum. Auk þess að tengja saman kynslóðir, stofnanir, setur, einstaklinga og listafólk. Síðast en ekki síst að innleiða nýja listahátíð í landshlutunum þar sem barnabækur, ímyndunarafli og sköpun barna eru í aðalhlutverki.“

Kristín segir að hugmyndin hafi fengið góðar viðtökur og bindur miklar vonir um framhald verkefnisins. „Hugmyndin kviknaði í kjölfar samstarfs okkar í Menningarhúsinu Hofi við Bókmenntahátíðina í Reykjavík, en við höfum tvisvar staðið fyrir dagskrá hér nyrðra í aðdraganda hennar og hún mælst afar vel fyrir. Þar sem hún átti að vera í apríl í ár kviknaði sú hugmynd að bæta barnabókmenntavinkli við dagskrá Bókmenntahátíðarinnar hér norðan heiða. Slá þar með tværi flugur í einu höggi og tengja viðburðinn við Barnamenningarhátíðina okkar hér á Akureyri um leið“. Aðspurð um verkefnið á tímum Covid segir Kristín að vel hægt sé að finna lausnir og vinna með þær fjöldatakmarkanir sem eru í gildi hverju sinni. „Við erum orðin býsna sjóuð í því hér í Hofi og ég veit að kennarar og stjórnendur skólanna eru með meirapróf í lausnamiðaðri vinnu hvað sóttvarnir og fjöldatakmarkanir varðar“, segir Kristín.

Samfélagsleg áhrif verkefnisins mikil

Samfélagsáhrifin segir Kristín felast í því að veita ungu kynslóðinni tækifæri til menningarlegs uppeldis með því að bjóða þeim að hlusta á og hitta verðlaunaða og vinsæla barnabókarithöfunda, auk þess að gefa henni tækifæri til að vinna með þeim í listasmiðjunum. „Við vonumst einnig til þess að áhrif hátíðarinnar verði þau að unga kynslóðin finni að barnamenning sé aðgengileg, mikilvæg og skipti máli.“

„Með hátíðinni bjóðum við uppá vettvang þar sem unga kynslóðin getur átt stefnumót við reynsluríka rit- og myndhöfunda, hlustað á upplestur úr bókum, spurt höfunda gagnrýnna spurninga sem brenna á þeim, átt samtál við höfunda og aðra þátttakendur, kynnst hugarheimi rithöfunda og því hvernig hugmyndir verða að spennandi söguviði með því að taka þátt í listasmiðjunum“, segir Kristín Sóley, verkefnastjóri.

FRIÐLAND SVARFDÆLA

Í desember 2020 voru veittir styrkir úr stefnumótandi byggðaaætlun til sértækra verkefna sóknaráætlanasvæða. SSNE vann umsóknir fyrir hönd átta verkefna þar sem þrjú þeirra hlutu styrk fyrir alls 56 m.kr. [Verkefnið Friðlandsstofa – anddyri Friðlands Svarfdæla í Dalvíkurbyggð var eitt af þessum verkefnum.](#)

Verkefnið snýr að því að endurnýja húsnæði Gamla skólans í Dalvíkurbyggð og stofna Friðlandsstofu með aðkomu Dalvíkurbyggðar og Umhverfisstofnunar. Unnið er að því að Friðlandsstofa verði fræðslusetur og aðsetur starfsmanns Friðlandsins.

Byggðasafn Dalvíkurbyggðar mun einnig flytja í Gamla skólann og er fyrirhuguð uppsetning fuglasýningar sem hefur verið í geymslu í nokkur ár. Töluverð vinna hefur verið lögð í að finna starfsemi sem hentar inn í húsnæðið til að koma því í notkun aftur og er Friðlandsstofa sprottin af þeirri hugmyndavinnu.

Fuglafriðlandið er það elsta á landinu og hefur verið byggt mikið upp undanfarið með bættu aðgengi, göngustígum, göngubrúum, fuglaskoðunarhúsum og fuglaskoðunarstígum. „Styrkveitingin gefur okkur í Dalvíkurbyggð byr undir báða vængi og erum við þakklát SSNE fyrir samstarfið. Nú hefst uppbygging anddyris Friðlandsstofu, flutningur Byggðasafnsins og einnig endurbygging Gamla skóla, verkefni sem hefur setið á hakanum í nokkur ár“, segir Katrín Sigurjónsdóttir, sveitarstjóri í Dalvíkurbyggð.



ÚTHLUTUN ÚR MATVÆLASJÓÐI

Nýverið var 566,6 m.kr. úthlutað úr [Matvælasjóði](#) og voru það alls 64 verkefni sem hlutu styrk að þessu sinni. Hlutverk sjóðsins er að styrkja þróun og nýsköpun við framleiðslu og vinnslu matvæla úr landbúnaðar- og sjávarafurðum. Sjóðnum bárust 428 umsóknir að þessu sinni en þetta var í annað sinn sem úthlutað var úr sjóðnum. 8 verkefni á NE fengu styrki en auk þess voru 9 samstarfsverkefni margra landshluta sem fengu styrki sem NE mun njóta góðs af. Á meðal styrktra verkefna voru:

- hagkvæmnisathugun og gerð viðskiptaáætlunar fyrir hátæknigróðurhús á Norðurlandi
- hagkvæmnisathugun á uppsetningu frostþurrkunarvers matvæla
- verðmætasköpun úr annars ónýttu fiskroði á Dalvík
- gerð viðskiptaáætlunar og vöruþróun Matarsmiðu í Eyjafjarðarsveit
- þróun á nýrri tækni og hugbúnaði í fiskvinnslu

[Hér](#) má finna upplýsingar um öll verkefni sem hlutu styrk að þessu sinni.

Eitt af yfirlýstum markmiðum sóknaráætlunar landshlutans er að auka hlutdeild Norðurlands eystra í úthlutunum opinberra styrkja og því fylgir hverri úthlutun greiningarvinna á bæði sóknarhlutfalli og árangurshlutfalli og í tilviki Matvælasjóðs að þessu sinni megum við vel við una á okkar svæði. Heildarfjöldi umsókna af NE var 51 umsókn og árangurshlutfallið 33%. Landshlutasamtökin tóku að sér veigameira hlutverk vegna Matvælasjóðs fyrir þessa úthlutun þar sem okkur var falið að halda kynningu á sjóðnum og því sem helst þyrfti að gæta að við umsóknarskrif. Þá tókum við að okkur að kynna sjóðinn sérstaklega vel á okkar svæði með það fyrir augum að auka fjölda umsókna og bæta gæði hverrar umsóknar. Sú vinna hefur bersýnilega skilað sér og margt lærdist af þessu ferli sem verður endurtekið og betrumbætt fyrir næstu úthlutun á vormánuðum 2022.

STYRKIR HAUST 2021

Styrkjavertíðin er í fullum gangi og er fjölbreytt svið styrkja sem hægt er að skoða og sækja um. Ráðgjafar SSNE veita upplýsingar um styrki og styrkjarmöguleika sem standa einstaklingum, fyrirtækjum og rannsóknaraðilum til boða en við hvetjum einstaklinga og fyrirtæki til að kynna sér málin á heimasíðu SSNE þar sem má finna yfirlit yfir styrki sem veittir eru frá ráðuneytum, Rannís, samfélagssjóðum, Uppbyggingarsjóði Norðurlands eystra ofl. Við vekjum líka athygli á því að mörg fyrirtæki veita samfélagsstyrki og hvetjum við fólk til að kynna sér þá. Athugið að listinn er ekki tæmandi.

Hægt er að bóka viðtal við ráðgjafa á ssne@ssne.is

- **Æskulýðssjóður / 15. október 2021**
 - **Fyrir hverja:** Börn og ungmenni, á aldrinum 6-25 ára. (Allir sem eru í forsvari fyrir æskulýðsfélög og æskulýðssamtök geta sótt um styrk úr sjóðnum).
 - **Til hvers:** Auka möguleika æskulýðsfélaga og samtaka á að bjóða fjölbreyttari starfsemi fyrir félaga sína.
- **Sóknarstyrkir / 20. október 2021**
 - **Fyrir hverja:** Stofnanir, fyrirtæki, vísindafólk og fræðimenn sem sækja um í alþjóðlega rannsóknasjóði. Forgangur er veittur þeim sem sækja um í Horizon Europe rannsókn- og nýsköpunaráætlun ESB, en mögulegt er að styrkja annað samstarf samkvæmt ákvörðun stjórnar sjóðsins.
 - **Til hvers:** Til undirbúnings umsókna í alþjóðlega rannsóknasjóði, einkum Horizon 2020.
- **Framkvæmdasjóður ferðamannastaða / 26. október kl: 13:00**
 - **Fyrir hverja:** Framkvæmdasjóður ferðamannastaða fjármagnar framkvæmdir á ferðamannastöðum og ferðamannaleiðum í eigu eða umsjón sveitarfélaga og einkaaðila.
 - **Til hvers:** Annars vegar vegna (nýrrar) þjónustu/aðstöðu á ferðamannastað / ferðamannaleið. Hins vegar vegna úrbóta vegna náttúruverndar og/eða öryggis á ferðamannastað eða ferðamannaleið.
- **Tónlistarsjóður / 1. nóvember 2021 kl: 15:00**
 - **Fyrir hverja:** Tónlistarfólk, hljómsveitir, kóra og aðra er koma að tónlistarflutningi.
 - **Til hvers:** Tónlistardeild veitir styrki til almennrar tónlistarstarfsemi, en markaðs- og kynningardeild veitir styrki til kynningar og markaðssetningar á tónlist og tónlistarfólki hér á landi og erlendis.
- **Glæðum Grímsey: Framkvæðissjóður Brothættra byggða / 24. nóvember**
 - **Fyrir hverja:** Einstaklinga, félag og aðra lögaðila óháð búsetu
 - **Til hvers:** Verkefna- og stofnstyrkir á sviði atvinnu- og nýsköpunar og á sviði samfélagsefingar í Grímsey

OPIÐ FYRIR UMSÓKNIR Í UPPBYGGINGARSJÓÐ

Opnað var fyrir styrkumsóknir í uppbyggingarsjóð landshlutans mánudaginn 4.október og verður umsóknarfresturinn lengri en verið hefur síðustu ár eða **til kl. 13.00 miðvikudaginn 10.nóvember.**

Veittir eru styrkir í eftirfarandi þremur flokkum:

- Verkefnastyrkir á sviði atvinnuþróunar og nýsköpunar
- Verkefnastyrkir á sviði menningar
- Stofn- og rekstrarstyrkir á sviði menningar

Í takt við sóknaráætlun landshlutans verður lögð sérstök áhersla á verkefni sem snúa að **umhverfismálum.**

Starfsfólk SSNE býður upp á viðtalstíma og persónulega ráðgjöf vegna umsóknaskrifa auk þess sem boðið verður upp á tvær rafrænar vinnustofur þar sem farið verður yfir helstu atriði umsókna og færi gefið á að spyrja spurninga sem brenna á þeim sem eru að móta sín verkefni og skrifa fyrir þau umsóknir.

Tvær tímasetningar eru í boði:

- 12 október kl. 12.00 - 13.00
- 21 október kl. 17.00 - 18.00

Hægt er að skrá sig á vinnustofurnar [hér](#).

Allar nánari upplýsingar um Uppbyggingarsjóðinn má finna [hér](#).

Umsýsla sjóðsins er í höndum Ara Páls (aripall@ssne.is), Hildar (hildur@ssne.is) og Rebekku (rebekka@ssne.is).



SÓKNARÁÆTLUN
NORÐURLANDS EYSTRA

FINNST ÞÉR FLÓKIÐ AÐ SÆKJA UM STYRKI?

Hjá SSNE er hægt að nálgast upplýsingar um ýmsa styrki sem í boði eru, bæði hér á landi sem og erlendis. Þá býður SSNE upp á fría ráðgjöf til einstaklinga og fyrirtækja vegna styrkumsóknarskrifa en nú bættum við um betur og **bjóðum upp á fjárhagsaðstoð til að niðurgreiða kostnað við sérhæfða ráðgjöf eða námskeið í styrkumsóknarskrifum.** Markmiðið er annars vegar að fjölga umsóknum af svæðinu og hins vegar að hækka árangurshlutfall umsókna af svæðinu. Þessi aukna aðstoð við styrkumsóknarskrif er hluti af verkefninu "Nýsköpun á Norðurlandi" sem var eitt af [áhersluverkefnum SSNE 2021](#). Einfalt og fljótlegt er að sækja um slíka aðstoð og er tekið við umsóknum allan ársins hring.

[Hér er hægt að fá frekari upplýsingar.](#)

• • • • • ÍBÚAFUNDUR Á BAKKAFIRÐI • • • • •

Stjórn verkefnisins "Betri Bakkafjörður" efndi til íbúafundar 8. september s.l. Fundurinn var mjög vel heppnaður og fjölmennur en farið var yfir stöðu verkefnisins og þeirra aðgerða sem sett voru fram í upphafi til að ná markmiðum sem íbúar og sveitarstjórn sameinuðust um. Alls hafa 23 fjölbreytt og áhugaverð verkefni verið styrkt úr Öndvegissjóði Brothættra byggða og þrjú styrkþegar tóku til máls á fundinum og sögðu frá sínum verkefnum

Vinna við samfélagssáttmála er á lokametrunum en helstu atriði hans voru kynnt af sveitarstjóra. Sáttmálinn er í samræmi við skýrslu nefndarfulltrúa fimm ráðherra um málefni Bakkaflóa, sveitarstjórnar Langanesbyggðar og ráðherra sveitarstjórnarmála

Þá var nokkur umræða um styrkveitingar en stutt er í að auglýst verði eftir styrkjum í Uppbyggingarsjóð Norðurlands eystra sem og í Öndvegissjóð Brothættra byggða og íbúar hvattir til að sækja um.



• • • • • SSNE Í GRÍMSEY • • • • •



Miðvikudagsmorguninn 22. september héldu Arna Björg Bjarnadóttir verkefnisstjóri Glæðum Grímsey og Anna Lind Björnsdóttir fulltrúi SSNE í verkefnisstjórn með ferjunni Sæfara til Grímseyjar. Snemma um morguninn bárust þær fréttir að Miðgarðakirkja hefði brunnið til grunna þá um nóttina. Þær stóllur ákváðu að halda ferðaáætlun, þó að breytingar yrðu á dagskrá heimsóknarinnar sem var m.a. að halda íbúafund í eyjunni. Fundinum var frestað en þess í stað buðu þær upp á viðtalstíma sem voru vel sóttir, heimsóttu fyrirtæki og kynntust íbúum. Með þeim í för voru fulltrúar frá Orkustofnun sem kynntu áform um orkuskipti fyrir íbúum. Ótrúleg upplifun er að heimsækja Grímsey og ljóst að Grímseyingar eru einstakt fólk.

Gylfi Þ. Gunnarsson er einn af eigendum útgerðarinnar AGS ehf.

Viðbrögðin við kirkjubrunanum sýnir best hvað Grímsey skipar stóran sess í hjarta þjóðarinnar. Íbúafundurinn verður haldinn við fyrsta hentugleika þar sem farið verður yfir helstu áherslur í verkefninu Glæðum Grímsey. Opnað hefur verið fyrir umsóknir í Frumkvæðissjóð Brothættra byggða en frekari upplýsingar má finna hér.

NÝ SKÝRSLA: STÖRF ÁN STAÐSETNINGAR

Staða og framtíðarhorfur

Þann 7. september sl., var gefin út skýrsla á vegum fjármála- og efnahagsráðuneytis, forsætisráðuneytis og samgöngu- og sveitarstjórnarráðuneytis um stöðu og framtíðarhorfur verkefnisins *Störf án staðsetningar*. Frá því að verkefnið var sett af stað hefur ýmsum áföngum verið náð en þó er langt í land. Greining á stöðugildum ráðuneyta og ríkisstofnana á höfuðborgarsvæðinu leiddi í ljós að í heild væri mögulegt að auglýsa um 10% starfa án staðsetningar, en það er í takt við markmið í gildandi byggðaáætlun. Alls skiluðu 100 stofnanir greiningu á stöðugildum og töldu mögulegt að auglýsa allt að 840 störf án staðsetningar. Niðurstöður einstakra stofnana eru birtar í skýrslunni en þeim er raðað eftir ráðuneytum, sem þau heyrja undir.

Störf án staðsetningar er hluti af byggðaáætlun 2018-2024 en í stefnuýfirlýsingu ríkisstjórnarinnar er kveðið á um að ráðuneytum og stofnunum þeirra verði falið að skilgreina störf og auglýsa þau án staðsetningar eins og kostur er, þannig að búseta hafi ekki áhrif við val á starfsfólki. Markmið verkefnisins er að efla byggðir landsins og að sporna við fækkun íbúa á einstökum svæðum og gera atvinnulíf fjölbreytilegra.

Hvar eru ríkisstörfin?

Byggðastofnun hefur frá áramótum 2013/2014 gert árlega könnun á staðsetningu starfa á vegum ríkisins. Nýjustu skýrslu sem er frá árslok 2019 má finna hér.

Persónuvernd opnar á Húsavík

Formleg opnun starfsstöð Persónuverndar á Húsavík fór fram þann 9. september sl., þar sem Áslaug Arna Sigurbjörnsdóttir, dómsmálaráðherra og Helga Þórisdóttir, forstjóri Persónuverndar fluttu ávörp ásamt Svavari Pálssyni, sýslumanni á Norðurlandi eystra.

Samkvæmt upplýsingum á vef Persónuverndar hefur uppsetning starfsstöðvarinnar farið fram í góðu samstarfi við embætti sýslumannsins á Norðurlandi eystra en útbúin hefur verið aðstaða fyrir starfsmenn Persónuverndar á aðalskrifstofu embættisins á Húsavík. Svavar Pálsson, sýslumaðurinn á Norðurlandi eystra sagði í ávarpi sínu að þetta samstarf sýni að krefjandi opinber störf, þar sem sérþekkingar og háskólamenntunar er krafist, sé auðveldlega hægt að staðsetja á landsbyggðinni, þegar víðsýni og stafrænar lausnir fari saman.

LIST FYRIR ALLA


List fyrir alla hefur formlega opnað glæsilegan vef þar sem hægt er að finna ítarlegar upplýsingar um barnamenningu og listviðburði fyrir ungt fólk sem gagnast bæði skólum og fjölskyldum. Á Norðurlandi eystra er menningarstarf óflugt, bæði ef lítið er faglegs starfs sem og áhugamenningar. Þá er safnastarf einnig óflugt og safnaflóran mjög fjölbreytt og starfsemin til fyrirmyndar.

Á kortasjá á vef Listar fyrir alla má á einfaldan hátt sjá yfirlit yfir söfn, sýningar og setur sem bjóða börn og unglinga sérstaklega velkomin. Á síðunni er að auki margt fleira áhugavert til að kynna sér, t.d. viðburði, barnamenningarhátíðir og fleira skemmtilegt. Við hvetjum alla til að kynna sér þennan nýja vef og fylgja þeim á Facebook.

FUNDUR MEÐ FORSÆTISRÁÐHERRA

Í byrjun mánaðar komu saman Katrín Jakobsdóttir forsætisráðherra og Arna Björg Bjarnadóttir verkefnisstjóri Glæðum Grímsey, ásamt Steingrími J. Sigfússyni forseta Alþingis og fyrrum formanni Grímseyjarnefndar, Rebekku Kristínu Garðarsdóttir verkefnastjóra SSNE og Lísu Kristjánsdóttur aðstoðarmanni forsætisráðherra á skrifstofu SSNE á Akureyri til að ræða málefni Grímseyjar.

Á fundinum var staða Grímseyjar rædd í víðu samhengi og farið yfir helstu tækifæri og ógnanir en samgöngumálin voru þó efst á baugi. Fundurinn var í alla staða mjög ánægjulegur og ljóst að samtalið við stjórnvöld um málefni Grímseyjar mun halda áfram á næstu misserum.



HEIMSÓKN FRÁ UTANRÍKISRÁÐUNEYTINGU

SSNE fékk góða gesti í mánuðinum frá Utanríkisráðuneytinu, þegar Einar Gunnarsson sendiherra og fyrrverandi fulltrúi Íslands í embættismannanefnd Norðurskautráðsins í formannstíð Íslands (2019-2021), Pétur Ásgeirsson nýr fulltrúi Íslands í embættismannanefnd Norðurskautsráðsins, Sólrún Svandal, sérfræðingur í málefnum Norðurslóða og Ásthildur Sturludóttir, bæjarstjóri á Akureyri komu til að ræða málefni Norðurslóða.

Eitt af áhersluverkefnum SSNE er Norðurslóðamiðstöð Íslands þar sem meginmarkmiðið er að Akureyri verði formlega viðurkennd Norðurslóðasmiðstöð Íslands, auk enn frekar vægi Akureyrar í málefnum Norðurslóða á Íslandi (Arctic Akureyri), auka samvinnu sveitarfélaga á Norðurlandi í málefnum Norðurslóða og auka stuðning við rannsóknasamvinnu á Norðausturlandi vegna umsókna í stóra samkeppnissjóði. Síðar sama dag fór fram undirritun á samstarfssamningi milli Norðurslóðanets Íslands og utanríkisráðuneytisins.

FUNDUR MEÐ UMHVERFIS- OG AUÐLINDARÁÐHERRA

Starfsfólk SSNE hitti Guðmund Inga Guðbrandsson, ráðherra umhverfis- og auðlindamála til að ræða sóknaráætlun SSNE og hlutverk landshlutasamtakanna varðandi frekari aðkomu að umhverfismálum sem eru ein af þrem stöðum sóknaráætlunar landshlutans. Það er því mikilvægt að átta sig á hlutverki SSNE og tryggja gagnvirk samskipti og bætt upplýsingaflæði.

Þá var sérstök áhersla lögð á að auka fjárframlög umhverfis- og auðlindaráðuneytisins til sóknaráætlunarinnar. SSNE hefur ítrekað gengið á eftir þátttöku fleiri ráðuneyta við fjármögnun sóknaráætlunar og þeirra verkefna sem úthlutað fá styrkjum úr uppbyggingarsjóði landshlutans enda hefur sá farvegur styrkveitinga sannað sig eins og lesa má um í nýrri skýrslu Byggðastofnunar auk eldri úttekta. Ráðherra tók vel í tillögur SSNE og fékk að launum eintak af sóknaráætlun og aðgerðaáætlun landshlutans sem vonandi mun koma sér vel í undirbúningi fyrir störf nýrrar ríkisstjórnar.



FUNDUR MEÐ SAMGÖNGU- OG SVEITARSTJÓRNARRÁÐHERRA

SSNE átti ánægjulegan fund með Sigurði Inga Jóhannssyni, samgöngu- og sveitarstjórnarráðherra þar sem margt bar á góma. Fundinn sátu einnig Ingibjörg Isaksen sem leiðir lista Framsóknar í Norðausturkjördæmi og Ingveldur Sæmundsdóttir, aðstoðarmaður ráðherra. Eyþór Björnsson, framkvæmdastjóri SSNE ítrekaði nauðsyn þess að nýta betur þann farveg sem sóknaráætlanir landshlutanna eru og bæta þannig skilvirki styrkveitingakerfi uppbyggingarsjóðs. Þá var áhersla lögð á aðkomu fleiri ráðuneyta að fjármögnun sóknaráætlananna og þá sérstaklega umhverfisráðuneytisins enda skipa umhverfismál sífellt stærri sess í stefnumörkun og aðgerðaáætlun landshlutans.

Þá voru störf án staðsetningar og þörfin fyrir gott aðgengi og vinnuástöðu fyrir þá sem kjósa rædd en eitt af yfirlýstum markmiðum ríkisstjórnarinnar eins og fram kemur í stefnumótandi byggðaáætlun að 10% allra auglýstra starfa í ráðuneytum og stofnunum þeirra verði án staðsetningar árið 2024 þannig að búseta hafi ekki áhrif á val á starfsfólki í ráðuneytum. SSNE þakkar öllum þeim ráðuneytum sem sáu sér fært að heimsækja okkur og fagnar áframhaldandi samtali.

FUNDIR MEÐ FRAMBJÓÐENDUM

Í aðdraganda kosninga fengum við heimsóknir frá frambjóðendum flestra flokka í Norðausturkjördæminu.

Við kynntum sóknaráætlun landshlutans og aðgerðaáætlun ásamt því að kynna áhersluatriðum hvers flokks og þeirra sýn á það sem brýnast er í kjördæminu. Þetta voru ánægjulegir og mikilvægir fundir með fólki sem lætur sig málefni landsbyggðarinnar varða og kunnum við þeim öllum bestu þakki fyrir að hafa tekið sér tíma til að ræða við okkur. Ljóst er að samtalið mun halda áfram þegar þing kemur saman á ný og línur lagðar í verkefnum nýrrar ríkisstjórnar.

Á myndunum eru fulltrúar Pírata, Sjálfstæðisflokksins, Vinstri grænna, Samfylkingarinnar og Viðreisnar ásamt starfsfólki SSNE. Mynd frá heimsókn Framsóknarflokksins má sjá í fréttinni fyrir ofan.



Loftslagsvænni sveitarfélög

Verkfærakista sveitafélaga í loftslagsmálum

Þann 22. september opnaði Samband Íslenskra sveitarfélaga nýja [verkfærakistu loftslagsvænni sveitafélaga](#).

Vefurinn hefur verið þróaður í góðu samráði við Umhverfisstofnun og sveitarfélög. Í sumar voru sveitarfélög hér af svæðinu að rýna verkfærakistuna og nú er búið að opna hana formlega eftir uppfærslur eftir rýni sumarsins.

Henni er ætlað að aðstoða sveitarfélög við gerð loftslagsstefnu með aðgengi að reiknivél, aðgerðum og samræmdu bókhaldi.

Við hvetjum sveitarfélög til að kynna sér verkfærakistuna en hana má finna [hér](#). Upptöku af opnun og kynningu á verkfærakistunni má finna [hér](#).

HEIMSÓKN BRESKA SENDIHERRANS

Dr. Bryony Mathew, nýr sendiherra Breta á Íslandi heimsótti SSNE þar sem margvíslegar leiðir til að efla samstarf Bretlands og Íslands voru ræddar. Bryony er nýlega tekin til starfa á Íslandi eftir störf sín í Kína, Indlandi og Kambódíu en mun nú verða 4 ár hið minnsta á Íslandi. Brexit og viðskiptasamningar við Bretland voru á meðal mála á dagskrá fundarins og áhersla var lögð á áframhaldandi uppbyggingu ferðaþjónustunnar á Norðurlandi í samstarfi við breskar ferðaskrifstofur og flugfélög. Þá sýndi Bryony stofnun Velferðartæknimiðstöðvar mikinn áhuga en lögð hefur verið áhersla á stafræna þróun heilbrigðiskerfisins í Bretlandi. Umhverfismál og Norðurlóðasamstarf eru henni einnig hugleikin.

Sendinefnd sendiráðsins staldraði við á Norðurlandi í nokkra daga og nýtti tímann til að hitta Háskólann á Akureyri, sjúkrahúsið, forseta bæjarstjórnar og formann bæjarráðs og ýmis fyrirtæki en þessi heimsókn lagði línurnar að góðu áframhaldandi samstarfi Norðurlands og Bretlands. Bryony hefur lagt sig fram um að læra tungumálið og gat sýnt afraksturinn þegar hún bauð gesti velkomna á hnökralausri íslensku í móttöku sem haldin var í Ketilshúsi í lok dags.



FYRIRTÆKJAHEIMSÓKNIR



Heimsókn í Slippinn: um borð í Oddeyrinni með Magnúsi Blöndal, markaðs stj.



Heimsókn í Ektafisk með Írisi Hauksd hjá Dalvíkurbyggð

SAMTALIÐ

Ágrip frá framkvæmdastjóra

Hafin er vinna við undirbúning samgöngustefnu fyrir Norðurland eystra en það er mjög þarft og mikilvægt verkefni. Um er að ræða eitt að áhersluverkefnum SSNE sem fékk RHA til að vinna skýrslu um mögulegar vegaf framkvæmdir. Skýrslan hefur verið kynnt fyrir kjörnum fulltrúum sveitarfélaga og verður innlegg í vinnuna sem framundan er. Páll Brynjarsson, framkvæmdastjóri SSV flutti erindi á haustþingi SSNE 1. október þar sem hann lýsti þeirri vinnu sem unnin hefur verið á Vesturlandi, annars vegar við undirbúning og gerð samgöngustefnu og hins vegar endurskoðun og áframhaldandi þróun stefnunnar. Það er mjög mikilvægt að við á þessu svæði náum að setja okkur sameiginlega stefnu í samgöngumálum sem nýtast mun í samtalinu við ríkisvaldið og til að þrýsta á um mikilvægustu aðgerðir. Það að koma fram með sameiginlega sýn og stefnu og tala einum rómi eykur styrk okkar og möguleika á að ná fram nauðsynlegum bótum í samgöngum. Ekki síst er það mikilvægt fyrir okkur hjá SSNE að hafa slíkt leiðarljós þegar við berjumst fyrir hagsmunum landshlutans. Næsta skref í verkefninu eru að gera verkefnisáætlun fyrir gerð samgöngustefnu, setja á fót verkefnishóp sem annast mun undirbúningsvinnuna og hefjast handa við öflun upplýsinga fyrir stöðumat.

Flеiri viðamikil verkefni eru á borði framkvæmdastjóra og má þar nefna undirbúning fyrir hagkvæmnimat vegna líforkuvers. Haldnir hafa verið nokkrir fundir um málið, bæði formlegir og óformlegir, til að stilla saman strengi og auka skilning á viðfangsefninu, draga fram svör við spurningum sem vaknað hafa og stuðla að opinskárrí umræðu. Þessir fundir hafa verið mjög gagnlegir og upplýsandi og leitt til góðrar umræðu um málið. Nú er hafin vinna við gerð hagkvæmnimats með fulltingi SSNE og styrk frá umhverfisráðuneyti og líkur eru á því að sveitarfélög á svæðinu styrki verkefnið svo ljúka megi matinu. Þegar hagkvæmnimatið liggur fyrir verður kominn sterkari grundvöllur til að taka upplýsta umræðu um þennan þátt umhverfis- og úrgangsmála á svæðinu og ræða næstu skref.

Framkvæmdastóri vann sinn fyrsta vinnudag í Ólafsfirði 6. september en eins og fram hefur komið stefni ég að því að vinna þar fyrsta mánudag í hverjum mánuði ef mögulegt er vegna annarra verkefna. Á þessum fyrsta vinnudegi mínum á Tröllaskaga komu fulltrúar Framfarafélags Ólafsfjarðar í heimsókn og ræddu málin. Það er mikilvægt fyrir starfsemi SSNE að framkvæmdastjóri, ekki síður en annað starfsfólk, nái góðri tengingu við aðila á öllu starfssvæðinu. Það er trú mín að aðstæður, með tilliti til heimsfaraldursins, séu að skapast til að efla það verulega.

Í aðdraganda kosninga til Alþingis buðum við fulltrúum þeirra flokka sem buðu fram í kjördæminu að líta við í heimsókn og ræða málin. Þar fórum við yfir mál sem okkur þykir mikilvægt að þingmenn, nýjir og þau sem setið hafa á þingi, hafi með sér inn á þing. En ekki síður voru þessir fundir nýttir til að efla tengsl við væntanlega þingmenn og hvetja til aukins samtals og samstarfs á komandi kjörtímabili. Flestir flokkar sáu sér fært að hitta okkur, fengu afhenta sóknaráætlun SSNE ásamt aðgerðaráætlun og hvatningu um öflugt starf fyrir landsbyggðirnar.

Með kærri kveðju

Eyþór Björnsson

SSNE auglýsir eftir verkefnisstjóra umhverfismála

SSNE leitar að öflugum verkefnastjóra í teymi atvinnuþróunar og nýsköpunar hjá SSNE með sérstaka áherslu á umhverfismál. Umhverfismál eru ein þriggja stoða Sóknaráætlunar Norðurlands eystra. Meginmarkmið sóknaráætlunar varðandi umhverfismál eru; Marka framtíðar- og heildarsýn landshlutans í umhverfismálum, efla staðbundna þekkingu á svæðinu í umhverfismálum, leggja okkar af mörkum til að mæta skuldbindingum Íslands varðandi bindingu CO2 og að koma til móts við þau markmið sem sett eru fram í landsáætlun varðandi meðferð úrgangs.

Um fullt starf er að ræða og gott ef viðkomandi getur hafið störf sem fyrst. Starfsstöð viðkomandi verkefnastjóra er á Húsavík en verkefnin spanna allt starfssvæði SSNE. Helstu verkefni og hæfnikröfur má sjá [hér](#).

Umsóknarfrestur er til og með **20. október 2021**.

Umsókn þarf að fylgja ítarleg starfsferilskrá og kynningarbréf þar sem gerð er grein fyrir ástæðu umsóknar og rökstuðningur fyrir hæfni umsækjanda.

Nánari upplýsingar veitir Sigríður Ólafsdóttir hjá Møgnum, sigga@mognum.is

[Sækja um starfið](#)



Viðverutímar starfsmanna

Akureyri - Elva og Rebekka eru við mánudaga til fimmtudaga 9:00-15:00 og á föstudögum til 14:00. Eyþór er á Akureyri 2 daga í viku að jafnaði. Meginreglan er að hann sé þar mánudaga og þriðjudaga en það er þó breytilegt eftir dagskrá hvernar viku. Verkefnastjórar Glæðum Grímsey (Arna) og Betri Bakkafjarðar (Gunnar) hafa einnig starfsaðstöðu á Akureyri.

Bakkafjörður - Gunnar Már er við mánudaga til miðvikudaga milli 9:00 - 15:00.

Dalvík - Anna Lind er við á þriðjudögum 9:00-15:00.

Grímsey - Arna Björg er með breytilega viðveru úti í Grímsey en er að jafnaði við á skrifstofu okkar á Akureyri mánudaga til miðvikudaga 10:00-15:00.

Húsavík - Silja, Ari Páll og Hildur eru við mánudaga til fimmtudaga 9:00-15:00 og fös 9:00-14:00. Eyþór er á Húsavík tvo daga í viku að jafnaði. Meginreglan er að hann sé þar miðvikudaga og fimmtudaga en það er þó breytilegt eftir dagskrá hvernar viku.

Ólafsfjörður - Anna Lind er við á mánudögum, miðvikudögum og fimmtudögum 9:00-15:00 og á föstudögum 9:00-14:00. Eyþór er þar að jafnaði fyrsta mánudag í hverjum mánuði.

Raufarhöfn - Nanna Steina er við mánudaga til fimmtudaga 9:00-15:30.

Vinsamlegast nýtið ykkur síma eða tölvupóst til að skipuleggja fundi því þó svo viðvera sé tiltölulega föst þá er betra að tryggja að starfsfólks sé til staðar. [Allar tenglaupplýsingar má finna hér.](#)